

da ducati 4000, et arzentì, calexi, paramenti, tapezarie et altro mobilè, per ducati 6000; et monicion non fo trovata, per non esser la verità, quello se diceva. Poi tolseno quel chomanda, et lo messe in croxe, et fece star 3 zornj, cussì volendo che dicesse quello che non sapeva. El qual confessò haver ducati 1242 de contadj, i quali herano denarj per spender per la jesa, et tuti tolse, et scrisse al signor soldan, el qual fece lassar i frati, ma stano con guardia, et tuto robe et denari messo in una camera, et quella bollada, fin altro ordine el signor soldan; nè altro è seguito a questi zornj. È morto, al Caiero, el miralbei; giudicassi se farà el Miracul, el qual nome Titubel fo signor a Tripoli. Alcuni dicono far el signor de Damascho, ambiduo amici nostri. A li passati zornj fo gran fortuna de ponente garbin, et ha rotto in Alexandria duo navilij de' turchi, uno de botte 500, et l'altro de 300, et tutte robe che sono suxo, zoè sartie, arnizi e altro, tuto sachizato et tolto. Et se trovava duo galie sottil de' turchi in Alexandria, qual, se dice fin hora, siano partite per tornar a Costantinopoli; sono malissimo in ordine; dubito, per esser bixognoxi, torano ogni roba che troverano. El nostro signor Idio ajuti a' christianj. Havendo habuto letere, in questa hora dal Caiero, ho havuto noticia esser zonto caravana de specie d'Altor, bona somma, et in Alterpo esser zonti navilij 17, pur con specie, adeo che, venendo galie, se judicha, haverà raxonevol cargo. Dice esser puocho piper, zenzeri 6, bona somma piper, valeva ducati 110 la sporta; zinzer 6, ducati 31 et 32; noxe, ducati 45, garoffali 56, macif 110, ma nulla si contrata per esser ogni cossa interdeta, come intendereti; et in Alexandria tuto sotto ballà si dj nostri, come de forestierj. In questa hora, mezo zorno. Come va Zudio dal Caiero, parti de li, a di 6 di questo; dice, in quel zorno, esser zonto al Caiero el magnifico consolo de Damascho, tra i molti merchadanti, dice, per numero 12, tra damaschinj, tripoliny et alepiny et raxonavassi per vere, che se sperava le cosse nostre passerano ben; ch'el Signor nostro cossi Idio permetti. Mj par gran praticia era stà fata con almiragli, adeo che tuti crida et parla in favor nostro. Spero in Dio tuto passerà ben. El dicto nostro magnifico consolo è stà messo in una gran caxa de Capso Capsomiel com tuti lj merchadanti, 23, 12, 5 de Damascho et da Tripoli, che sono, et sier Mathio Contarini, missier Marim Pezani, missier Anzolo Michiel, missier Bernardin Testa, et de 3 d'Alepo, missier Andrea Morzon, missier Ottaviam Bon et l'altro non so. Per quanto havemo a bocha, dal Caiero, dicono, el nostro magnifico con-

solo de Damascho con tuti soi merchadanti et del magnifico consolo de Alexandria era andati, a di 13 del corente, havanti al signor soldan, el qual mj par li haveva facto malissima ciera, con gram rebuffi, et poi mandati zoxo, messi in cadena in dieta caxa. Le cosse habi a spazarse con manzaria, nè altro attende questo signor soldan. Altro più particolarmente non ho da scrivervj.

Copia de una lettera scripta per sier Aloyse Mora et mj Zorzi Franchinij in Candia, data in Alexandria, a di 5 decembrio 1510. 81

Intendessi per altre mie, come per i caxi opperati per i roditj, fo bolati tuti i magazeni de' forestierj et nostri; et al Caiero fo menado el consolo di cattelanj et tuti poi subditi, et posti per alcuni zorni in grandi destrettj et catene; el qual, poi che in *secretis* se abochò con el signor soldan, fo liberato de cadena, et lui con bona ciera et parolle vien acharezadj. Quello che insieme habino tractato, non se puol intender; chè, per segni se comprende, l'habi promesso gran cosse, per il che è stà destenuto duo nave dj raguxei che presto dieno partir, una per Rhodj con duo frati de Jerusalem, per esser ancor loro stà menati al Caiero, con i qual va uno messo del dicto consolo per haversi de primo obligà de far restituir morj et tutta la sua roba, che fo prexa; et l'altra nave per Puglia, adretura, con duo altri frati, con altro messo del dicto consolo, con sue letere al re de Franza, et prima se dieno tal frati abochar con el sommo pontifice. Quello che reussirà de l'opperar suo, non so comprenderlo; et perchè dicto consolo dj cattelanj è debito di ducati cinquanta a' mori, tra li qual el signor soldan per specie et dacierj dovea haver da X.^m, el die dar grande 4 milia, per il che lj soi merchadanti mandò tuor et consignar botte 200 oglj, datj a ducati 6 1/2 la botta, per tal pagamenti che valeno ducati 9, et cossi se tien per satisfar soi creditori; el resto, con le robe di soj merchadantj; le promesse sue, et de far più facendo che prima, che, non so, come le gambe lj servirà.

Copia de una lettera directiva a lo spectabile missier Aloyse Fileti, canzelier de Candia, scripta a le Barulle, a di 19 fevrier 1510, per sier Mathio dj Coltj.

Per un'altra scripsi, a compimento, per el presente galion, questa fazo, per dirvj, in questa hora sono zonto uno nostro venitian, qual se chiama Ca-